

**Jeju Na Mehkwỳ Jakrã Cunea
Wỳr
HAPU NA PETRÔ JÕ
KÀHHÔC**

Ỡhỹ, pê Petrô pê Jeju jarkwa na memprar catêjê nõ. Ne pê mam cupê teppro catê. Pê Jeju cupê ihkôt ipa catê na ahna ahwỳ. Ne Jeju te cõjkwawỳr hàpir jirô pê mã ri, cupê Krĩpinkrên kam Jeju na mehkwỳ mehkrĩ atajê to ihhimpej catêjê nõ. Ne ramã cute mehcuran xà na hàhtêp na cutehahkre pej. Ne pom cu hapu na me hõ kàhhôc cahyt ita, pjê cunea kam Jejuna mehkwỳ wỳr, cute ihkujahêc. Na ri hapu na hõ kàhhôc ita japrỳ te **Jeju Na Mehkwỳ Jakrã Cunea Wỳr, Hapu Na Petrô Jõ Kàhhôc** (2 Petrô).

Ne kam me pamã jũ caxuw jũmjê te me cupê Jeju na mehkwỳ na amji jarêñ, ne nee cute Jeju te amji kam hapac xàintuwti impejti kôt me ipa nare atajê mã ihcawpa. Ne hanea ne Jeju te amji kam hapac xà tuwti ita kôt me papa kam me to pancrà na, me pamã apô.

Petrô te amji jarêñ xà

¹ Hàpà me ikwỳ! Ipê Ximãw Petrô pê Jeju Crixto mã ijapên catê, ne ipêcumã harkwa na iprar catê nõa wa. Wa ite Jeju jarkwa na memprar catêjê kwỳ me, me amã ihhôc. Ne Jeju pê me pahpytâr catê me, Hũm catyt kam meipa. Cwỳrjapê ri cukwa kam cute me ato, ate amji mã

me to ahimpej catêjê. Na ri ita caxuw me apê ipyràc.

² Ne imã, me ate ihcunea na, Pahpãm me, me pajõ Pahhiti pê Jeju jahkre pejpejtí na, me ato prãm. Mãr quê amjia kôt me ato impej, ne me acaxwãm pê me amã ihcarĩcti gõ, mãr ca nee amji mã me ampo cupa nare, ne ihcunea name ate amji kam me gapac xà tuwti capēnti to me apa xà ata to, me amã ipicamēn to mō.

*Pahpãm me pamã ampo pej jãhtôa ne cugõ
Pirip 2.12-13; 1 Texarõn 1.2-4; 2 Petrô 3.18*

³ Ne ramã me pamã Jeju jahkre pej pejtu, na ri cute Hũm carôat kôt mepamã me pahcarôt jõr, pahte ihkôat catyt kam ame papa xà caxuw. Ne hanea ne Jeju kam me ajpēn hõnco xà ita kôt cute impejti ita kam ajpēn kam ame papa, ne me papê hũràac xà caxuw, cute me pahcapi.

⁴ Ampeaj kam Pahpãm pej, ne hàhcaprĩ cati, na ri cute ahpÿanre na me pamã ampo pej cunea jõr na amji to hũjahkre. Ne hanea necute me pamã, cute amji kam hapac xà tuwti, impejti ita jõr na, amji to hũjahkre. Ne cute me pamã amji kam hapac xà tuwti to hũjahkre ata ri, cute ita kam me pamã hõr, mãr cu me papê hũràac, ne me cupê Pahpãm curê xwÿn catêjê atajê te amji kam hapac xà kēn kro, ne ihcacure xen atajêpê me to amji pytà, ne cupê me pahcato, ne quêt pahtÿj catyt kam ame papa.

Cu pahtÿj mãnea mã me hahkre pej to prãm

⁵ Pahpãm te ramã ate Jeju to amji mã me ahimpej na me aton, na ca atÿj ramã amji mã me to ahimpej to me apa.

Na ca ha ita caxuw me caa, ate amji kam me gapac xà impejti kôt, catyt kam me apa.

Na me caa amji mã meahihcuxêc to me apa.

Ne hanea ne ma, ate mePahpãm jahkre pej xà ita to me caa, amji mã me apicamên to me mõi.

⁶ Ne hanea ne, ate me ampo kên ton xà atajê cunea intête me amji jiprõnto me apa.

Ne ca ha hanea ne ate me amji pupun xà kêanre to me amji pupun xà atajê kam me awcanãane, ne nee jũ caxuw me Jeju jicu nare.

Nehanea ne ihcunea na Pahpãm mã me amjigõi, mãr ca ihkôat catyt kam me apa.

⁷ Ne hanea ne, Jeju kam ajpên to me akjêjê atajê me, me ajpên to me akwỳ impeaj ne.

Ne ca ha hanea ne Pahpãm cuxà, amã mehcunea kĩnti ne.

⁸ Na ca ha atỳj ate me to hajỳr to apicamên to me apa, mãr quê ate amji mã Jeju to meahimpej xà atajê kôt hamre nare. Na ca ha quêt me pajõPahhiti pê Jeju Cixtô kôt catyt kam ame apa xà atajê kôt, ihtỳj me amã ampo.

⁹ Ne me akwỳ kwỳ, nee cute amji kam me hapac xà itajê to me hajỳr to me ipa nare. Atajê mã ri, neePahpãm to amji japackre nare. Por cute mehkên atajêcunea to impej, ne totojnõ, ne me cumã cuteamji kam hapac xà intuwti jõr na, nee me to amji japackre nare. Ne me cupê mento tũm pyràac, na ri nee me cumã amji jahkre pej, mã me amji pupun nare.

Cu ha ihcunea na, catyt kam Pahpãm kôt me papa na, amji to me ahcukij

¹⁰ Jeju kam ajpën to me pahkjêê itajê, he amji mãa ri Pahpãm te me pamã hàkjêr, ne mepahcapi, cwýrjapê ca ha catyt kam, ihcunea na, Pahpãm kôt me apa na, amji to me ahcukij. Ca haate ita to me hajÿr na, ca ha nee jũ caxuw Pahpãm jõ pry kaj na, jũ kam cupê me pry hyr narê.

¹¹ Na quê ha ihtÿj me amã, me pajõ Pahhiti pê Jeju Crixto pê mepahpytâr catê ata himpej xà krac ri, me amã me acjêj xà. Na ca ha me axà, ne cahê na me akrĩ rohnÿtti mã.

¹² Ne ate ramã me Pahpãm te amji kam hapac xà impejti jahkre pej. Ne ca atÿj amji mã me huwahi to tÿaj na, imã me gahkre pej cakrô, wa ha itÿj hõtpê atehipêr me to amji japackre na me ato, ca me to amji japackre.

¹³ Imãa, wa cormã itĩr na ipa ita kam, wa ha itÿjate me to amji japackre name ato ita na imã impejti, na ca ha me to amji japackre.

¹⁴ He ramã me pajõ Pahhiti pê Jeju Crixto te imã ityc xà jarën, na quê ha ahtũm nare, wa ha ty.

¹⁵ Cwýrjapê ca ityc xà jirô pê, nee meto gapac kêt nare, ne me to amjijapackre kam me to acrà tu. Ne ita caxuw ite me amã to hahkre xà ihtÿaj to ihtÿj cakrô, wa itÿj ihcunea na me amã to hahkre to mõ.

Pê Petrô into jĩa to Jeju jàhcujro catia pupu

2 Timot 3.16-17

¹⁶ He pê wa me amã me pajõ Pahhiti pê Jeju Crixto te amji carôt tÿjti to, cute amji jaxàrna, me amã harën xà ata, pê wa nee amjia kôt, ikrãa kam to amji japackre, ne me amã harën nare. Ne

nee pê jũm amjia kôt imã Jeju jarẽn hêj xi xanõ to hũjarẽn nare. Ipê Petrô, ne pa pê wa me ikwỳ me, me icunea me ito jĩa to me hirôa pê Jeju catia to cati na me hõmpu to hane he.

17-18 Pê wa Jeju me, kẽn pejti na Pahpãm wrỳc xà ata na ame ipa, pê wa me Pahpãmcarôt jàhcujrohti te Jeju jĩ cunea kam hàhcujro na me hõmpu. Ne hanea neite carôt jàhcujrohti pĩn Hũm pê Pahpãm te me imã Jeju to hũjarẽn to:

— Hũmre ita pê imã ikra kĩnti ata, ne ampeaj kam hũrẽn ijakry — hajỹr na me kampa.

Mam Pahpãm jarkwa to mehcakôc catêjê nee amehhêj xi nare

19 Ne cõjkwa pĩnimpar xà ata kôt, wa cormã ite me, por pê mam me cupê Pahpãm jarkwa to mehcakôc catêjê atajê te ampeaj kam me hũjarẽn na me to amji japackre, ne me hahkre pej. Ne cormã ite me hũjarẽn xà ita to amji mã me hajỹr to hipêr me ipicamẽn. Na ca ha cute me Pahpãm jarkwa to mehcakôccatêjê kam me gapac na, quê ha ihtỳj me Pahpãm me ato impejti ne. Ne pom awcapatkô kam hàhcujro xà ahcujro, cu ihkôt me ampo pupu, ita jĩkjê namã, Pahpãm jarkwa to mehcakôc catêjê te me hajỹr, ne ihtỳj me pahte Pahpãm pupun na me pahto, cu me hõmpu, ne me hahkre pej. Ne pom hãn necaxêti hapôj mã apêto ipa, cu me ampo cunea pupu, ne me hahkre pej, ita jĩkjê na mã, hacpỹ ne Jeju te amji jaxàr xà ata te hajỹr. Ne quê ha Jeju cator xà atapê caxêtia pyrác, neihtỳj me pahte me Pahpãm pupun pejti na me pahto, cu ha me hõmpu, ne me hahkre pej pejtu ne.

20-21 Ne mam Pahpãm jarkwa to mehçakôc catêjê atajê, pê nee amjia kôtmehhôn nare. Ne Pahpãm Carõ Pejti te me cumã harkwato hũjarên xà atajê na pê mehhôn pa. Ita kam, xà cu ha ajkĩ mehkàhhôn ata cahyt, ne amjia kôt me kampa, ne me hahkre pej pej pyrentu? Hãpà! He Pahpãm Carõ Pejti ata quê ha me pahte me harkwa ata kôt me hakop, ne me hahkre pej na me pahto, cu ha me hahkre pej, na cu ha me to amji japackrea ne.

2

Cute amji kam me hapac xà kên xyre cawpa xà Coroxo 2.16-19; 1 Timot 3.1-9; 4.1-5; Juta 3-16

¹ Pê mam Ixaher catêjê wÿr, me hũmre te amji jarkwa kôt me cumã mehçakôc catêjê kêanre atajê me cato. Ne me cupê Pahpãm jarkwa to mehçakôccatêjêa na me cumã me amji jarê. Ne cama ame cumã mehhêj, ne ajco mehkrãakam ame cumã ampo kên atajê to pit mã hahkre to me ipa. Ita jĩkjê na, quê ha me akam ita hanea, ne ihtÿj aracri me awÿr, cute me amã ampo to hahkrecatêjê kêanre atajê nõ cato, ne ame amã ihhêj, ne cute ampo to me hahkrexà kêanre atajê to pit mã, me amã hahkre to me ipa. Cute, ate Jeju to amji mã me ahimpej xà ata to me apê hamre prãmatajê te, me pajõ Pahhiti pê mehkên pê me hũtâr catê ata te me hahpan xà na caprô to hàmjôr ata jicu, ne ahname harcô mên. Cwÿrjapê ri me cutea me amji kên mã me amji mên. Na quê ha ahtũm nare quê ha ihtÿj jũ caxuw Pahpãm me to hamre hiahpuro.

² Ne cute me cumã ampo kên to hahkre xà atajêa kôt, quê ha me hàhtôa ne mehkôat, cute amji kam me hapac xà kam menxyre kêanre atajê to meamji kam hapac to me ipa. Quê ha me cupê Pahpãm na mehkwy nare atajê ahna me hõmpu, ne me amji mã:

— Cute amji kam me hapac xà ata kêanre, mõrmõ me hõ Pahpãm ita kêanre, na mã ihkôat cute amji kam me hapac xà ita kêanre — hane.

³ Ne cute me amã ampo to hahkre catêjê itajê te, me apê me gõ pore catia ne incwyr prãmte ri, ame amã mehhêj xia jarên to me ipa. Ne xà quêha ajkĩ ihtyj cute mehkên ton xà itajê pê me amji pytà? Hãpà! He Pahpãm te ajpên pê me to haprãr catê ata me kôpĩr to ipa, ne rý pêamã cute mehkên mã me mênxàa kam ramã jy. Ne cumã cute me hajyryjê to hamre xà na ramã me hahkre pej.

Cu ha Pahpãm tekjê na me amji jarê ne mãnea mã pahkên ton nare

⁴ Ne mam côjkwa kam, Pahpãm mã memprar catêjê kwý te harkwa jirô pê mehpým, ne mehkêanre ton atajê ri nee Pahpãm te, ihtyj ame ipana me hamãr nare na, ramã me amã hahkre pej. Ne pêmehcunea pro, ne mehcajpre, ne kre jatôhhy narekam awcapàtkôti ata kam me to hũcapêr pa. Ne quê ha curi mehcuhhê ita na, quê ha ahnaa Pahpãm te mehcukij, ne mehkên mã me irên xà ata jõ amcro kamahtwý. Quê ha mehkên itajêa kôt, ajpên pê me to haprã, ne mehkên itajê mã ame curê.

⁵ Ne pê hanea ne mam, rỳ pêa mã me panquêtjê nõpê Nowe xwỳ jõ amcro kam, Pahpãm nee mehkên catêjê cunea te me amji pytâr na me hamâr nare. Ne cute cõhti ata to mehcunea jipej tu. Ne cute Nowe xwỳ me, hĩxi me, mehkraincrê me, mehprõ crê atajêpit pytâr. Pê te catyt kam cute ame ipa to ame cumã hahkre to ipa cakrô, pê nee mempar nare na, ca me to amji japackrea ne.

⁶ Ne Pahpãm te cuhy to Krĩhcumrãrti me, Krĩhpôc jõ krĩ kam mehkên catêjê atajê cunea to caxâr, ne me to hamre na, ca me to amji japackre. Ne cute me to hamre xà ita pê, cute mehkên catêjê cunea mã amji cawpa xà ata na, ca me to amji japackrea ne.

⁷ Ne Ro xwỳ pê Aprãw xwỳ tàmxwỳ ata, pê ma apu hõ krĩ ata kam mehkrĩ atajê te amji kam mehapac xà kam menxyre kêanre atajê cunea caca, ne me hũ na cumã amji kĩn nare. Na pêPahpãm cuhy to cute krĩ to caxâr xà ata pê hũtâ.

⁸ Ne pê Ro pê hũmre impejti ata amcro cunea kam, cute mehkên ton xà atajê cunea pupu, ne kampa, na pêamcro cunea kam, caxwỳn pejti ata cunea kam, me hũ na ihpeacre.

⁹ Ne Pahpãm te ampo to me panquêtjê to hamre xà ita, ihtỳj me pamã cute me pahto amji kam hapac xà to hahkre. Ne ihtỳj cumã, por catyt kam meipa atajê kên pê me hũtâr jahkre pej. Ne hanea ne cumã mehkêanre atajê te mehkên ton jahpan xà na, cute mehcukij, ne mehkên mã me irẽn xà jõ amcro atacaxuw cute me hamâr, ne me huwahi jahkre pej.

Mehhêj xi catêjê mã nee jũm cupa nare

¹⁰ Ne quê ha Pahpãm, cute amji kam me hapac xà kêanre kam menxyre atajê to, mehkwy jirôa pê apu ihkêanre ne. Ne quê ha hanea ne nee amji mã me pajõPahhiti cupa nare atajê to me hirôa pê apu ihkêanre ne. Ne me akwy kam, cute me amã ampo kêanre to hahkre catêjê atajê, ampeaj kam amjia kôt me ipa to prãm na, me hàhtàt nare kam me ipa. Ne nee amji mã me cõjkwa kam Pahpãm mã memprar catêjê jõ pahhi kwý te to ihcupan atajê cupa nare, ne ihtýj hãn ne me hũn kêanre to me ipa.

¹¹ Ne cõjkwa kam Pahpãm mã memprar catêjê kwýa pê, nee ahti na ihtýj ame hũn to me ipa atajê pyrác nare, ne quêt me hũmre atajêjirôa pê me carôt týj cakrô, mã nee Pahpãm mã memprar catêjê te to ihcupan atajê xũn, ne mehkôt harên kêanre to ame ipa nare.

¹² Ne me amã ampo kêanre to hahkre catêjê atajê te amji kam me hapac xà atajê na mehahkre pej nare kam ame hũn to me ipa. Ne ihhêj rũm me cupê ampo pê cute amji kam hapac xà hamreare atajê pyrác. Mã jũmjê te ame hahêr, neamehcuran xà caxuw, hãn ne me ajhu. Na quê ha me hipej tu, quê ha me hamre tu.

Mehhêj xi catêjê ihtýj me pahte amji kam me pajapac xà impejti to hamre

¹³ Ne cute me jũm te amji pupun xà kêanre na me ton, mã cute ahna amji pupun ata jahpan xà na, quê ha Pahpãm me to hũràac, ne cute me amjipupun xà kêanre na me to, quê ha ahna me amji pupu. Ne hãn ne amcro cunea kam, hirãa

pê me kam mare mã, cute amji kam me hapac xà kêanre kam menxyre atajêkôt apu memprar to pyt. Ne ca ha hãn ne amji mã me amji kîn to, ne me akrĩ, ne ame apà. Quê ha ihtỳj me acahê na mehrĩ ne me apà, ne mecupê Pahpãm na mehkwyà na me amã amji jarẽ, ne cama ame amã mehhêj. Me cupê me amã me apahàm catia ton catêjê, na ca ha atỳj me kam, meapahàm catia to cati.

¹⁴ Ne quê ha ahti na me jũm cahãj pupun xàa ri, ramã ihtỳj cahê na mehikwa, ne amehcaxun na me amji to prãm pyrentu. Ne nee ajte cute mehkên tonxà itajê kam amehtycrĩ xà nare. Ne ampeaj kam me cumã, pom kyre pê Pahpãm to amji mã mehhimpej atajê to, mehkên mã me hàr xà ata wỳrme to ipa to prãm. Ne mehcuneaajirôa pê me cumã, amji mã cute me ampo cunea to mehtũm prãm to ramã cute me amji pyrác tu. Atajê, quê ha Pahpãm mehkên jahpan xà na ame to ihtỳj tu ne.

¹⁵ Cute Pahpãm jõ pry cupan, na ri ihhêj ne ipictor, ne ma Pahpãm pê ampỳa mã apu ipa. Ne cupê Parãw xwỳ pê Pejor xwỳ kra ata pyràac. Parãw ata pê me cumã Pahpãm jarkwa to ihcakôc catê cakrô, pê ajte cute amji mã ihpore nõ pyr prãmte, ramã ampo te ihcupan xà to me cumã hahkre to mỗ.

¹⁶ Mã cawrô cahàcre te mehĩ cakôc xàa to cumã ihcakôc, ne ihtỳj cute ihkên ton ata tête cumãn, ne pea hõ pahhi kam waj te amji kamhapac xà ata tête ihhyr.

Mehkrã kêanre itajê ihtỳj Xatanaj jõ cuhy wỳr imprar xà

17 Ne ihhêj ne me hũmre itajê pê ampo pejti toncatêjê, ne hamreare, rỳ jũ caxuw ajte cute me ampo pejti ton nare. Na ri me cupê ihhêj rũm cõhkre kam cô nare ata pyràac, ne hanea ne me cupê ihhêjrũm ahcacrã to ipa, mã kôc ma to pra, mã nee jũ ri hàhhuc nare ata pyràac. Cwỳrjapê ri ramã Pahpãm te ita jahpan xà na, cute ma kre jatõhhy narekam awcapàtkôti ata wỳr mehkujahêc na me to amji kam hapac hiahpuro.

18 Ne nee me cumãa, cute me amji kam hapac xà atajê na amji jahkre pejnare kam, ihtỳj mehcunea mã amji to me hàmnãn to ame ipa. Ne cute amji kam me hapac xà kam menxyre kēanre atajê to, por curmãmehkên ton catêjê atajê pê cormã me hapôj ne Pahpãm wỳr me ipipkjêr, ne cormã kyre pê Jeju toamji mã mehhimpej atajê mã ihhêj, ne intête me to hawry.

19 Ne hãn ne me amã hũjarên to me ipa to hane he:

— He nee jũm te ampo itajê na, me ato ihhimpej catê hamreare. Cwỳrjapê caha gapacta ne atỳj me ampo itajê cunea ton to me apa — hajỳr cacrô, quêha cute amji kam me hapac xà kēanre to ame ipa to, cute me amji pyràc xà atajêa pê quê ha ihhêj rũm me hõ pahhi, na quê ha taame to ihhimpej. Na quê ha nee meamji mã hamãr, ne mehkên ton jicu nare. Ỡhỳ, por cu ha ampo to amji mã me pahhimpej ata pê quê ha me pajõ pahhi, na quê ha taa me pahto ihhimpej.

Cu ha me pampej mã me acjêj, ne kam me papa rohnỳtti mã

20 Ne mehkwȳ te ame ampo kêanre ton to me ipa, ne ramã mehkên cati w̄yr mempraar kam, cute me pajõ Pahhiti pê Jeju Crixto pê me pahkritxw̄ȳ na meharên par. Ne h̄yrmã me ipipkjêr, ne toa amji mã mehhimpej xà ata kôtri, pjê ita kam, cute amji kam me hapac xà kêanre atajê pê me cator. Jirô pê mã ri, cute ajte me Jeju te amji kam hapac xà impejti ita jicu, ne ahna me harcô mên, ne hacp̄ya mã cute amji kam me hapac xàkêanre ata w̄yr me ipipkjêr, ne toa amji mã mehhimpej to me ipa. Ne cute amji kam me hapac xà ita pê ri me hõ pahhi. Ne me cupê ihhêj rûm kryhti te apu ampo teppro ata pyrâac, ne nee amji mã hamâr, ne me ampo kên tonjicu nare. Ne hamre, ita caxuw cute mamme amji pupun xà ata jirôa pê ihkêanre ita mã me hâr.

21 Quê ha jûm te ramã Jeju jahkre pej, ne ihkôat ramã ipa cacrô, cute hîcu, ne hipêr ampo kên ton to ipa na amji mã to ihhimpej na, quê ha jûm teJeju jahkre pej nare kam, to kên xà ata jirôa pê Pahpãmapu to kêanre ne. Ne por wa ame ato icakôc itajê, quê r̄y mã nee me Jeju te amji kam hapac xà impejti ata na me hahkre pej nare. Ampo na? CuteJeju te amji kam hapac xà pyr ata jicu xàa kam, quê ha mam cute me amji pupun xà atajê jirôa pê, cute meamji pupun xà ata me cumã ihkêanre ne.

22 Ne cute me haj̄yr catêjê pê, pê mã nãm, pom rop hãn ne hõjahir, ne ahna ahtûm nare, mã hacp̄ya mã hõjahir ku, ita na mã cute me haj̄yr. Nepê mã nãm crô te haj̄yar, quê ha cô ata kam xwa, ne amji cuhhõ, ne ahnaahtûm nare, quê ha hacp̄ya ne amji jaxà, ne carêc ata kam xwa.

Ita jĩkjê na mã mehkên catêjê te me hajÿar, ne mempej mã me acjêj, nekam ame ipa ry nare, ne hacpÿa mã mehkên mã me acjêj.

3

Quê ha ihtÿj jũ caxuw Pahpãm ampo cunea to hamre

Ruc 13.6-8; Tijac 5.7-11; Ipipên Xà 19.11-16

¹ Imã ikwÿ nõ kĩnti itajê, pom ihkàhhôc ita pê hapu na ite me amã ihhôc ita. Ne pom ite me amã ihkujahêc to ipijakrut ita kam, wa itehipêr ate amji kam me gapac xà impejti, tetetti to ate amji kam me gapac na me aton, mãr ca nee me to gapac kêt nare.

² Ne wa ite me amã Pahpãm jarkwa rer atajê to, ate meamji japackre na me aton. Ne mam rÿ pêa mã Pahpãm jarkwa to mehcahôc catêjê atajê, pê catyt kam ajco me ipa, ne mempejti. Ne imã, por me harkwa cunea na ihhôc atajê to, ate me amji japackre na, imã me ato prãm. Ne hanea ne me pajô Pahhiti pê me pahpytâr catê te me amã harkwa na me iprarcatejê na me iton atajê nõa mã cute me amã harkwa jirên atajê to, ca me amji japackrea ne.

³ Ne imã me ate ampo cunea jamre xà kam, me awÿr mehkêanre japôj xà ata na, ate me hahkre pej na, me ato prãm. Ne quê ha, cute amji kam mehapac xà kêanre to amji mã mehhimpej to me ipa atajê, quê ha amjia kôtame ipa. Ne ame ana xwÿ to me ipa to:

⁴ — Por Jeju te amji jaxàr xà na me amã amji to hÿjahkre ata, jô ri mã cator xà ita? Nee jũ

caxuw cator xà nare. Ne ramã ame pahcũmxwý cunea tyc par. Mã mam ramã pjê te amji ton pêa mã, ampo cunea cormã hãm ita na, ne nee rý jũ caxuw ampote amji to ipintuw nare — hane.

⁵⁻⁶ Ne pom me ana xwý to ame ipa itajê, cama ame amã mehhêj to ame ipa. Ampo na? He pjê te amji ton pêa mã, ramã kam ampo jàhtôa te amji toipintuw. Pê mam Pahpãm pjê me cõjkwa te amji ton na cumã harkwa, pê ihtýj amji to. Ne cute cô me pjê to ajpên pê ipicapôn jirô pê mã ri, Nowe xwý jõ amcro kam, hacpýa mã cute cô ita to pjê cunea pro, ne to mehcunea jipej tu. Nepom ame ana xwý itajê mã, nee ita jahkre pej prãm nare.

⁷ Pê pjê me, cõjkwa te amji ton na cumã harkwa, ne hanea ne jũ caxuw cutea amji to caxàr na cumã harkwa hyr hiahpuro. Ne nee ita caxuw cama me tohamre pyrentu to prãm nare. Quê ha xa Pahpãm te mehcuneacukij xà jõ amcrocato, quê ha amehcukij, ne ajpên pê me to haprãr xà ata na pit mã ramã me hikaj. Ne quê ha amcro ata cato, quê ha Pahpãm mehkên catêjê cunea kên mã me curê.

Pahpãm mã me pahnõ pictor na to prãm nare, na ri cormã me pajikaj

⁸ Imã me ijõ ikwý nõ kĩnti itajê, me pajõ Pahhiti mãa, caku te mir pê amcro pyxit peaj. Ne cumã amcro pyxitpeaj pê caku te mir. Na ca ha atýj me to amji japackre.

⁹ Ne mehkwy me to amji kam hapac xà to kêanre ne me amji mã: — Me pajõ Pahhiti te ampo na amji tonatajê, quê ha jũa caxuw cormã

to. Nare, quê ha nee cute ampo na amji ton xà atajê nõ ton nare — hane. Ne ampo na mã hacpÿa ne cute pjê ita wÿr amji jaxàr xà ita to kuu apu ihkên? Nee mã ampo na nare, Pahpãm mã mehnõpictor na to prãm nare, ne cumã mehcunea te hÿrmã meipipkjêr na me to prãm, na ri cormã me hikaj.

Quê ha jũ caxuw pjê me cõjkwa kam ampo cunea to caxàr partu

¹⁰ He nee amã me hàhkĩj xi te me awÿr imprar, ne me apê ampo to hàhkĩj xà na hahkre pej nare. Ita jĩkjê na mã hacpÿ ne me pajõ Pahhiticator xà te hajÿar, na ca ha nee amji wÿr cator xà na me hahkre pej nare. Ne cator xà jõ amcro ata kam, quê ha hàhkrihkrit krãhhi tÿjti meajkaam, quê ha jũ kam cõjkwa tẽ. Ne jũ kam ihtêm xà ata kam, quê ha ramã pyt capa, ne putwrÿ capa, ne caxêre cunea capa, ne ampo cunea caxàr tu. Ne hanea ne pjê kam ampo itajê cunea to caxàr tu.

Jeju te amji jaxàr xà caxuw amji mã me pajàhcuprõn hiahpuro

¹¹ Ne me amã ampo itajê cunea jamre na hahkre pej ita kam, jũ mã ca ha ajte me? Ca ha atÿj Pahpãm mã me amji jõr to me apa, ne catyt kam me apa.

¹² Ne Jeju te amji jaxàr xà jõ amcro ata pê Pahpãm jõ amcro catia. Na ca ha cator xà ata na me hikaj. Ne ca ha ampo pej cunea to me gápên to me apa, mâr quê cyt ne me awÿr cato. Ne cator xà ata jõ amcro kam, quê ha cuhy cõjkwa tohamre. Quê ha pjê cacroa to cacro, ne ihhorhot ne ajgã.

13 Cu ha Pahpãm te me pamã pjê intuw me cõjkwa tuw ton na, me pamã amji tohũjahkre xà ata na, cu ha me hikaj. Ne pjê me cõjkwa tuwatajê kam, quê ha mehcunea, ihcunea nacatyt kam Pahpãm jarkwa kôt me ipa rohnýtti mã.

14 Cwýrjapê ca ha imã me ijõ ikwý nõ kĩnti itajê, ate me amcro ita jikaj xà ata kam, ca ha ramã ate amji kam me gapac xà tetetti, impejti kam ampokên jamreare ata to amji mã me gâhcuprõn hiahpuro na, imã me ato prãm. Mår quê cato, ne ahnaa me pahcunea pupu, ne ihkôt me pahna amji capa, ne nee ame pahcurê nare.

*Pê jũmjê Pawrô jũjarẽn xà kaj na me to pry ta
2 Timot 3.1-17; 1 Jowãw 3.2-3*

15 Ne Pahpãm te apu kuu ihkên xà ita pyrên ca ame gakry. Ampo na? Ca cormã apu ihkên ita kam, ihhêaj to cormã me anõ hýrmã apkjê, quê haakên pê apytà. He Pahpãm te ramã me pamã me pahtõ kĩnti pê Pawrô ata mã amji jahkre pej catia ne hõr. Mã cute amji jahkre pejti ata kôt ampoitajê na me amã ihhóc.

16 Ne cute hõ kàhhóc cunea kam ihhóc atajê kam, cute ramã me pamã Jeju te amji jaxàr xà ita kôt harẽn to amji pyrác tu. Ne hõtpê hõkàhhóc kwý kam, me papê ampo kwý kam me pajapac jahkre kêatre atajê na hãn neme pamã ihhóc. Ne cute me amji jahkre kêatre atajê me, cormã kyre pê Jeju kôt me ipa atajê, ampo itajê kôt harẽn xà kaj na ame harẽn. NePahpãm jarkwa jõ kàhhóc kwýa kôt me harẽn xà ihmajti atajê to pit mã me

harẽ. Ne cute me harẽn xà atajê to me taa me amji kên mã me amji rẽ.

Cu ha Jeju te amji kam hapac xà tuwti kam amji to ajcamẽ

¹⁷ Ne me ca nare, me ijõ ikwỳ nõ kĩnti itajê. Ramã quêt me amã jũmjéatajê te amji kam me hapac xà teihcupan na, me amã hahkre pej. Cwỳrjapê ca ha amji to me guphêa ne. Ampo na? Ca ihhêaj to hanea ne mehkôt me Pahpãm jõ pry ta, ne ihkaj na ame apa. Ne nee hipêr catyt kam Pahpãm te amji kam hapac xà kôt me apa nare.

¹⁸ He pê me pajõ Pahhiti pê Jeju Crixto pê me pahpytâr catê, me pamã cute amji kam hapac xàtuwti gõ ita, ca ha cute me akam ipicamẽn na cama me hamã, quê ajcamẽ. Mâr ca mam ate amji kam me gapac xà atajê jirôa pê catyt kam apa. Ne ita caxuw, cu ha hõtpê Jeju to amji mã me cati to me hane he:

— Quêt apyxit peaj ne acati, ne ampeaj kamapej rohnýtti mã. Ne wamehcunea te, pjê cunea kam, quêt acatihti me apejti na, me gahkre pej na meto prãm — hane. Taamã, ampeaj kam!

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a